



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

INDIKATOR MATLAMAT PEMBANGUNAN MAMPAN (SDG), MALAYSIA, 2023

Malaysia komited capai Agenda 2030 dengan ketersediaan 196 indikator pengukuran kemampanan Kemajuan Masyarakat, Kemakmuran, Penjagaan Bumi, Keamanan dan Kerjasama

PUTRAJAYA, 5 DISEMBER 2024 – Jabatan Perangkaan Malaysia (DOSM) telah menerbitkan **Laporan Indikator Matlamat Pembangunan Mampan (SDG), Malaysia, 2023** yang merupakan laporan kali keenam sejak tahun 2018. Laporan ini mengandungi 196 indikator di peringkat nasional, 82 indikator peringkat negeri dan 26 indikator di peringkat daerah yang menyediakan input bagi penilaian pencapaian SDG Malaysia pada tahun 2023.

Ketua Perangkawan Malaysia, Dato' Sri Dr. Mohd Uzir Mahidin berkata, “Laporan Indikator SDG, 2023 merupakan siri kedua 21 penerbitan yang merangkumi lima laporan di peringkat nasional dan 16 laporan mengikut negeri. Lima laporan di peringkat nasional terdiri daripada Ringkasan Eksekutif dan empat laporan mengikut tema berdasarkan lima bidang tumpuan SDG iaitu Kemajuan Masyarakat (Matlamat 1, 2, 3, 4 dan 5), Kemakmuran (Matlamat 7, 8, 9, 10, dan 11), Penjagaan Bumi (Matlamat 6, 12, 13, 14 dan 15), Keamanan (Matlamat 16) dan Kerjasama (Matlamat 17)”.

Daripada 248 indikator SDG global, indikator SDG Malaysia pada 2023 mencapai 196 indikator Tersedia, 28 indikator Sebahagian Tersedia dan Perlu Dibangunkan,

17 indikator Tidak Tersedia dan 7 indikator Tidak Relevan. Justeru, berdasarkan 241 indikator SDG yang relevan kepada Malaysia, negara ini telah mencapai 81 peratus ketersediaan indikator SDG pada tahun 2023.

Dari aspek bidang tumpuan **Kemajuan Masyarakat**, indikator di bawah Matlamat 3: Kesihatan yang Baik dan Kesejahteraan iaitu nisbah mortaliti ibu bersalin (MMR) mengukur prestasi bagi Sasaran 3.1 yang menyasarkan untuk mengurangkan nisbah mortaliti ibu bersalin di peringkat global kepada kurang daripada 70 bagi setiap 100,000 kelahiran hidup menjelang 2030. Malaysia telah mencapai Sasaran 3.1 sejak 1979. MMR bertambah baik pada 2023 iaitu 25.7 berbanding 26.0 bagi setiap 100,000 kelahiran hidup pada 2022. MMR terendah pada 2023 direkodkan oleh Terengganu (11.5 bagi setiap 100,000 kelahiran hidup) dan tiada kes MMR direkodkan di Perlis dan W.P. Labuan.

Dalam bidang tumpuan **Kemakmuran**, indikator di bawah Matlamat 8: Pekerjaan yang Sesuai dan Pertumbuhan Ekonomi menunjukkan kadar pengangguran bertambah baik kepada 3.4 peratus pada 2023 berbanding 3.9 peratus pada 2022. Kadar pengangguran dijangka akan terus berkurang selari dengan perkembangan ekonomi semasa di negara ini. Merujuk kepada kadar pengangguran mengikut negeri pada 2023, 11 negeri merekodkan kadar pengangguran di bawah paras nasional dengan tiga negeri mencatatkan kadar pengangguran terendah iaitu W.P. Putrajaya (0.8%), Melaka (1.6%) dan Pahang (2.0%).

Melihat kepada aspek **Penjagaan Bumi**, indikator di bawah Matlamat 13: Tindakan Iklim menunjukkan penurunan bilangan orang yang terjejas akibat bencana kepada 192,593 orang pada 2023 berbanding 199,244 orang pada tahun sebelumnya. Johor mencatatkan jumlah orang terjejas tertinggi pada tahun 2023, dengan keseluruhan seramai 89,130 orang, diikuti oleh Kelantan (43,730 orang) dan Terengganu (24,757 orang). Selain itu, status kualiti air marin di kawasan pantai berdasarkan Indeks Kualiti Air Marin kategori Cemerlang pada 2023 meningkat kepada 106 stesen berbanding 88 stesen pada 2022. Pahang merekodkan stesen air marin kategori cemerlang tertinggi iaitu sebanyak 22 stesen, diikuti Johor (19 stesen) dan Terengganu (16 stesen).

Dari segi **Keamanan**, indikator di bawah Matlamat 16: Keamanan, Keadilan dan Institusi yang Teguh menunjukkan bilangan kes jenayah kekerasan berkurang kepada 8,539 kes pada 2023 berbanding 8,636 kes pada 2022. Berkaitan dengan peratus orang tahanan yang tidak dijatuhkan hukuman sebagai sebahagian daripada jumlah keseluruhan banduan, bilangan tersebut meningkat kepada 33.0 peratus pada 2023 daripada 29.5 peratus pada tahun sebelumnya.

Seterusnya dari segi **Kerjasama**, indikator Matlamat 17: Kerjasama demi Matlamat menunjukkan peratusan individu yang menggunakan Internet di Malaysia meningkat secara marginal kepada 97.7 peratus pada 2023 berbanding 97.4 peratus pada 2022. Tujuh negeri mencatatkan peratusan individu menggunakan Internet yang lebih tinggi daripada tahap nasional, iaitu W.P. Putrajaya (99.9%), W.P. Kuala Lumpur (99.9%), Pulau Pinang (99.0%), Selangor (98.8%), Johor (98.6%), Negeri Sembilan (98.4%) dan Melaka (98.0%).

Selari dengan usaha untuk meningkatkan ketersediaan indikator pengukuran kemampuan, kementerian dan agensi terus berperanan dalam pengukuran pencapaian indikator ini dengan menyumbang sebanyak 77 peratus daripada keseluruhan indikator SDG 2023. Kerjasama dengan kementerian dan agensi serta pertubuhan masyarakat sivil (CSO) akan terus diperkukuhkan dalam mengurangkan jurang ketersediaan data sekaligus meningkatkan ketersediaan data granular terutama bagi empat Matlamat dengan ketersediaan indikator kurang 70 peratus iaitu Matlamat 10: Mengurangkan Ketidaksamaan (64%); Matlamat 12: Penggunaan dan Pengeluaran yang Bertanggungjawab (69%); Matlamat 15: Kehidupan di Darat (57%); dan Matlamat 16: Keamanan, Keadilan dan Institusi yang Teguh (67%). Penyediaan indikator yang berkualiti adalah signifikan dalam mengukur dan memantau pencapaian Rancangan Malaysia Ke-12 (RMKe-12) serta penyediaan Rancangan Malaysia Ke-13 (RMKe-13) sekaligus memastikan pelaksanaan Agenda 2030 tercapai.


Laporan Indikator Matlamat Pembangunan Mampan (SDG), Malaysia, 2023 boleh dimuat turun secara percuma di portal DOSM (www.dosm.gov.my).

Embargo: Hanya boleh diterbitkan atau disebarkan mulai jam 1200, Khamis, 5 Disember 2024

DOSM telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Kerajaan Malaysia telah mengisytiharkan Hari Statistik Negara (MyStats Day) pada 20 Oktober. Tema sambutan MyStats Day adalah “Statistik Nadi Kehidupan”. DOSM menyambut ulang tahun ke-75 Jubli Intan pada tahun 2024.


Carta 1: Ketersediaan Indikator SDG, Malaysia, 2018-2023




Nota:

Bilangan indikator di peringkat global bagi tahun tersebut dipaparkan di dalam carta

Carta 2: Ketersediaan Indikator SDG mengikut Matlamat, Malaysia, 2021-2023



Paparan 1: Infografik pencapaian indikator SDG terpilih mengikut lima bidang tumpuan (5P), Malaysia, 2023



Dikeluarkan oleh:

PEJABAT KETUA PERANGKAWAN MALAYSIA

JABATAN PERANGKAWAN MALAYSIA

5 DISEMBER 2024